

**Nunat Avannarliit Killiit Siunnersuisoqatigiiffiata Islandimi, Kalaallit Nunaanni Savalimmiunilu suleqatigiinnermut naalakkersuisunut kaammattuutigaa Nunat Avannarliit Killiit aalajangersakkatut kaammattuutaanik nunat malitseqartitsisarnerat pillugu suleqatigiinnermut naalakkersuisut ukiumoortumik nassuiaateqartarnerat siusarsaqqullugu Nunat Avannarliit Killiit Siunnersuisoqatigiiffiannut ataatsimut allakkatigut nassuiaateqartarnermut suleqatigiinnermut naalakkersuisut paarlakaajaallutik aqutsisuusarnerisigut.**

(Aallartitat siulittaasuat Kim Kielsen)

### **Akissuteqaat**

(Nunanut Allanut, Inuussutissarsiornermut Niuernermullu Naalakkersuisoq)

### **Siullermeerneqarnera**

Nunat Avannarliit Killiit Siunnersuisoqatigiiffiannut aallartitat siulittaasuata Inatsisartut Suleriaasianni § 33, imm. 3, nr. 1 malillugu aaljangiiffigisassatut siunnersuuteqarneranut Naalakkersuisut qujapput.

Nunat Avannarliit Killiit Siunnersuisoqatigiiffianit Islandimi, Kalaallit Nunaanni Savalimmiunilu suleqatigiinnermut naalakkersuisut kaammattorneqarput, Nunat Avannarliit Killiit aalajangersakkatut kaammattuutaanik nunat malitseqartitsisarnerat pillugu suleqatigiinnermut naalakkersuisut ukiumoortumik nassuiaateqartarnerat siusarsaqqullugu Nunat Avannarliit Killiit Siunnersuisoqatigiiffiannut ataatsimut allakkatigut nassuiaateqartarnermut suleqatigiinnermut naalakkersuisut paarlakaajaallutik aqutsisuusarnerisigut.

Nunanut Allanut, Inuussutissarsiornermut Niuernermullu Naalakkersuisoqarfimmit nalilerneqarpoq, Nunat Avannarliit Killiit Siunnersuisoqatigiiffiata kaammattuutaanik malitseqartitsinissaq pillugu ataatsimut nalunaarusiornissaq suliassaavallaassasoq, nunammi pineqartut naalakkersuisuisa akornanni ataqatigiissaarisooqartariaqassamat. Tamatumani pingaartumik ukiumoortumik nalunaarusiap imassai pillugit naalakkersuisut pingasuusut taakku isumaqatigiissuteqarnissaat naatsorsuutigisariaqassappat.

Naalakkersuisut taamatut suliaqartoqarnissaanut maannakkorpiaq sulisussaqaangillat.

Tamatumunnga taarsiullugu Kalaallit Nunaannut inassutigineqarpoq, Nunat Avannarliit Killiit Siunnersuisoqatigiiffiata suleriaasiata pisariillisarneqarneranik Nunat Avannarliit Killiit Siunnersuisoqatigiiffiata suliaqarneranik, tassunga ilanngullugu Nunat Avannarliit Killiit Siunnersuisoqatigiiffiata Nunat Avannarliit Killiit naalakkersuisuinut suliaqarnerannik ukkatarinnillunilu tapersersuissasoq.

Taakku tunngavigalugit Naalakkersuisut siunnersuutip itigartitsissutigineqarnissaa inassutigaat.